

03.03.2017.

Istaknute brojne primjedbe i sugestije na Nacrt zakona o šumama FBiH



U Goraždu je danas održana javna rasprava o Nacrtu zakona o šumama FBiH.

Javnu raspravu organizovalo je Federalno ministarstvo poljoprivrede, vodoprivrede i šumarstva u saradnji s Ministarstvom za privredu BPK Goražde, a učešće u raspravi, uz predstavnike resornih ministarstava na federalnom i kantonalnom nivou, uzeli su i predstavnici JP „Bosansko-podrinjske šume“, Kantonalne uprave za šumarstvo, predstavnici udruženja privrednika, obrtnika i poslodavaca, kao i druga zainteresovana lica.

Stručni savjetnik u resornom kantonalnom ministarstvu Rasim Sijerić podsjetio je Ustavni sud Federacije BiH, 2009. godine, stavio van snage Zakon o šumama FBiH, nakon čega je Federalna vlada donijela dvije uredbe na osnovu kojih je bilo omogućeno gazdovanje šumama.

Uzimajući u obzir nastalu situaciju, te potrebu da se ova oblast zakonski uredi, BPK Goražde je 2013. godine usvojio kantonalni Zakon o šumama.

– Vlada BPK odnosno Skupština kantona je donijela kantonalni zakon, znači da smo mi donekle uredili tu oblast kako bi sačuvali naše šume u BPK Goražde. Glavna stvar koja se odvijala oko federalnog Zakona o šumama jeste nezadovoljstvo opština sa raspodjelom prihoda od šuma. Znači, opštine u ovom momentu bile su oštećene po izdvajanju sredstava, gdje je Federacija bila dužna dio sredstava na osnovu iskorištavanja šuma proslijediti lokalnim zajednicama – kazao je Sijerić.

Nacrt zakona o šumama FBiH usvojen je u oba doma Parlamenta FBiH te je ostavljen rok od 90 dana za provođenje javne rasprave po ovom nacrtu.



iz www.bpkg.gov.ba